



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Cornelii Iansenii Episcopi Iprensis Avgvstinvs**

In quo hæreses & mores Pelagij contra naturæ humanæ sanitatem,  
ægritudinem & medicinam ex S. Augustino recensentur ac refutantur

**Jansenius, Cornelius**

**Lovanii, 1640**

15. De alijs nonnullis dogmatibus. Redditur ratio ordinis.

**urn:nbn:de:hbz:466:1-13650**

De alijs nonnullis dogmatibus. Redditur ratio  
ordinis ac propositi.

## CAPVT XV.

**P**OSSENT & aliæ nonnullæ quæstiones de statu primorum hominum disputari, ut quid de meritis ipsorum & præmijs Pelagiani sentiant, de prædestinatione hominum in statu innocentiae, de corporum propagatione alijsque non paucis. Sed quia nihil peculiare de similibus in Pelagianorum monumentis traditum invenio putavi esse superlegendum: ex alijs enim Pelagianæ doctrinæ fundamentis quæ de Adami posteritate dicturi sumus facile dissolvuntur. Vnum namque ex præcipuis eorum dogma fuit ut etiam superius diximus, *inantes nuper natos in eo esse statum quo Adam ante peccationem fuit*. Ex quo manifestissime sequitur quod & palam profitebantur eandem Adami & posterorum esse rationem, nec dissimiliter de utrisque, maxime si naturam spectes esse statuendum. Vt facile quæcunque de statu naturæ & gratiæ posteritatis Adæ deinceps ex Pelagianorum sensu discernenda sunt, ijs quæ ante de primis hominibus dicta sunt conjungi unâ disputatione potuissent. Duabus tamen de causis, quædam separanda esse judicavi. Primò quod ipsa rerum distinctio per se maximè grata sit. Deinde quod omnia quæ separatim de primis hominibus asserta reperi atque deduxi, ea semper atque constanter de illis sine ulla fluctuatione, vel dogmatum mutatione tenuerunt. Et quamvis in primo istius hæreseos ortu paria quoque de illorum posteritate sentirent, ut tamen quæque dogmata paulatim Catholicorum argumentis pulsata atque concussa sunt, ita respectu lapsorum hominum multis ea modis immutando, mitigarunt, ac

de nimia superbia erubescerent, suffocanti eos veritati magis magisque cesserunt. Quare ne quis mutationum vel statuum istius hæreseos confusione turbaretur, arbitrandò quæcunque dogmatum commutationes ad omnem quoque statum humanæ naturæ pariter esse referendas, ea majoris luci & commoditatis causa disjuncti. Separatim in hominis lapsi statu traditurus ac suppleturus; si quid quoque modo mutatum vel diversum ab ijs quæ jam superius commemorata sunt, vel alioqui in homine ut nunc nascitur dignum consideratione protulerint. Nam in cæteris eandem utriusque status esse rationem atque huc esse recurrendum lectorem admonendo suggeremus. Deinde cum error addisci debeat non ut sciatum tantum, sed ut veritatis luce caveatur, ac robore conteratur: Non alio seopo Pelagianorum dogmata recensenda suscipi, nisi ut quid Catholica improbet fides ac doctrina, constaret. Cujus quidem vestigijs inherendo, nonnulla Pelagianorum asserta si ad statum innocentiae, primorumque hominum integritatem viresque referantur, tanquam recte dicta doctrinæque Catholice consentanea comprobanda sunt, sin vero ad statum illius ruinas lapsorumque infirmitatem, erroribus plena. Quare cum necessario in Catholice veritatis assertionem seorsim de innocentiae statu disputandum sit, seorsim etiam malui præcipuas adversantium opiniones afferre, ut in quo consentiant, aut dissentiant accurate ipsa collisione erroris & veritatis appareat.

FINIS.



F 2

CORNE.